

5

T 3149/3232.83

汾州府志

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1938

5

汾州府志卷之十

宦績上

杜敬侯延年字幼公南陽杜衍人昭帝時封建平侯宣
帝卽位以定策安宗廟益戶二千三百爲人安和備於
諸事久典朝政上任信之出卽奉駕入給事中居九卿
位十餘年坐霍氏舊人免官數月復召拜爲北地太守
居歲餘上使謁者賜延年璽書黃金二十斤徙爲西河
太守治甚有名五鳳中徵入爲御史大夫後三年薨謚
曰敬侯

來節侯歙字君叔南陽新野人今平遙縣西有來城相

傳爲歙所築無可證實。

崔鈞字州平涿郡安平人少交結英豪有名稱爲西河太守獻帝初與袁紹俱起兵山東以討董卓。

右漢三人舊志於名宦祠列漢西河太守杜延年於平遙縣名宦祠列漢大中大夫前守禦平遙縣來歙考宣帝時西河郡治遠在西河今府境西四屬爲西河郡所領之藺離石土軍等縣東四屬爲太原郡所領之茲氏京陵中都鄆界休等縣西河治遠而太原治近後人徒因北魏之西河郡在是而求諸史傳中見西河太守之賢者秩而祀之太原則後代不相屬

故不之及耳於漢不列太原太守而列西河非例也今仍昔人之舊一去一存說詳職官題名至來歙後漢書列傳絕不言其曾涉是地徒因世傳來城之名歸之於歙故題云前守禦平遙縣而縣志竟列於知縣山西通志職官內遂稱建武時平遙令謬矣歙始歸光武帝卽拜大中大夫尋拜中郎將加以令之名出於無稽又漢太原郡平陶其故城在今文水縣北魏徙置於漢京陵城西改陶爲遙是來城在今平遙縣境者縣名起於北魏舉而上加之漢又謬之甚者今姑存而論之以當疑事勿質云爾。

賈渾不知何郡人太安中爲介休令及劉元海作亂遣其將喬晞攻陷之渾抗節不降曰吾爲晉守不能全之豈苟求生以事賊虜何面目以視息世間哉晞怒執將殺之晞將尹崧曰將軍舍之以勸事君晞不聽遂被害右晉一人舊志於名宦祠列魏西河太守房豹晉汾州刺史王雅西河太守刁雙於介休縣名宦祠列晉介休令賈渾惟賈忠義一人得其實其稱房豹也曰武城人爲政清淨甚著奇績考之北史房法壽傳云清河東武城人子翼翼子豹豹政貴清靜甚著聲績乃當北齊世祖時爲西河太守不知何以誤列之晉

以前其稱王雅也曰新門人明帝初除汾州刺史山西通志則云太寧初爲汾州刺史更舉其後拜少傅孝武將擢王恭殷仲堪一事考晉書王雅傳雅字茂達東海剡人孝武帝深加禮遇時人被以佞倖之目隆安四年卒時年六十七而明帝太寧初下距隆安四年凡七十八年不知通志何以不察至是且汾州之名起於北魏晉無是名又晉太寧時此地屬石勒孝武世此地屬苻堅尋屬慕容垂晉無此地也自太寧初下距北魏太和十二年改吐京鎮名汾州凡百六十餘年距孝昌中汾州移治西河凡二百餘年由

是言之。晉太寧初無王雅。無汾州。卽孝武世亦無汾州之地。及汾州之名。而曰晉汾州刺史王雅。謬矣。北周有汾州刺史王雅。字度容。周書列傳云。闡熙新固人。世宗初。除汾州刺史。勵精爲治。人庶悅而附之。自遠至者七百餘家。蓋北周世宗明帝初。舊志誤繫之。晉通志遂以孝武時王雅與此合爲一人。改明帝初曰太寧初。於兩人時代皆失之。新固訛作新門。又北周之汾州。其地在今吉州。非府境。時府境屬北齊。此徒求諸史傳中。見汾州刺史之賢者。秩而祀之。而於時代沿革茫然不辯。是以紛紛淆誤。刁雙則北魏肅

宗時西河太守。亦非晉。

穆羆代人。襲爵宜都王。除虎牢鎮將。轉征東將軍。離石鎮將。羆賞善罰惡。深自刻勵。山賊劉什婆寇掠郡縣。羆討滅之。自是境內肅然。後改吐京鎮爲汾州。仍以羆爲刺史。前吐京太守劉升。定陽令吳乎仁。羆以吏民懷之。並爲表請。高祖皆從焉。羆旣頻薦升等。所部守令咸自砥礪。威化大行。百姓安之。州民李軌。郭及祖等七百餘人。詣闕頌羆恩德。高祖以羆政和民悅。增秩延限。後徵爲光祿勳。

劉升。高祖時爲吐京太守。在郡甚有威惠。限滿還都。民

八百餘人。詣鎮將穆羆請留羆以吏民懷之。爲表請詔從焉。

封孝宣回。渤海菑人。本名叔念。高祖賜名回。皇興初。爲中書學生。襲爵富城子。世宗卽位。以回行華州事。尋除鎮遠將軍。汾州刺史。肅宗初。授平北將軍。瀛州刺史。又爲度支尚書。尋轉都官尚書。冀州大中正。滎陽鄭雲諂事長秋卿劉騰。貨騰紫纈四百匹。得爲安州刺史。除書旦出。暮往。詣回。坐未定。謂回曰。我爲安州卿。知之否。彼士治生何事。爲便回答之曰。卿荷國寵靈。位至方伯。雖不能拔園葵。去織婦。思方畧以濟百姓。如何見造而問。

治生乎。封回不爲商賈。何以相示。雲慙媿失色。莊帝初。遇害於河陰。時年七十七。謚曰孝宣。

刁清穆雙。字子山。渤海饒安人。少好學。兼涉文史。雅爲中山王英所知。賞拜西河太守。正光初。中山王熙之誅也。熙弟畧投命於雙。雙護之周年。時購畧甚切。畧乃謂雙曰。我兄弟屠滅已盡。唯我一身漏刃。相託卿。雖厚恩久見容蔽。但事留變生。終恐難保。脫萬一發覺。我死分也。無事相累。卿若送吾出境。便是再生之惠。如其不爾。輒欲自裁。雙曰。人生會有一死。死所難遇耳。今遭知己。視死如歸。願不以爲慮。畧後苦求南轉。雙乃遣從子昌。

送達江左靈太后返政知畧因雙獲免徵拜光祿大夫莊帝初以功封曲城鄉男興和三年卒謚曰清穆

裴良字元賓河東聞喜人時汾州吐京薛羽等作逆以良兼尙書左丞爲西北道行臺值別將李德龍爲羽所破良入汾州與刺史汝陰王景和及德龍率兵數千憑城自守景和薨以良爲汾州刺史加輔國將軍行臺如故先是官粟貸民未及收聚仍值寇亂至是城民大饑人相食賊知倉庫空虛攻圍日甚死者十三四良以饑窘因與城人奔赴西河汾州之治西河自良始也

右北魏五人舊志於名宦祠列西魏汾州刺史韓褒

後魏汾州刺史王慶而刁清穆誤繫之晉今改正韓褒當北周保定三年爲汾州刺史王慶當北周大象元年爲汾州刺史繫之西魏後魏胥誤北周之汾州其一在今陝西宜川縣卽西魏所置之汾州其一在今吉州乃東魏所置之南汾州其一在今霍州隋書云開皇十六年置寔起於北周韓褒傳所謂州界北接太原當千里徑齊寇數入民廢耕桑是也皆非府境

房豹字仲幹東清河繹幕人體貌開岸美音儀河清中除謁者僕射拜西河太守地接周境俗雜稽部豹政貴

汾州府志 卷一 名宦
清靜甚著聲績遷博陵太守又遷樂陵太守風教修理
稱爲美政齊滅遂還本鄉邱園自養頻被徵命固辭以
疾終於家

右北齊一人舊志於名宦祠列之三國魏山西通志
於職官亦列之三國魏於名宦列之北魏晉誤今改
正

虞慶則京兆櫟陽人本姓魚慶則幼雄毅性倜儻身長
八尺有膽氣善鮮卑語被重鎧帶兩劍左右馳射本州
豪俠皆敬憚之初以弋獵爲事中更折節讀書常慕傅
介子班仲升爲人襲爵沁源縣公宣政元年授儀同大

將軍除并州總管長史二年授開府時稽部數叛越王
盛內史下大夫高頴討平之將班師頴與盛謀須文武
榦畧者鎮邊表請慶則於是卽拜石州總管甚有威惠
境內清肅稽部慕義而歸者八千餘戶

右北周一人舊志於名宦祠列後周侍中行汾州事
宇文測考測以大統四年拜侍中長史六年坐事免
尋除使持節驃騎大將軍開府儀同三司大都督行
汾州事八年加紫金光祿大夫轉行綏州事大統寔
西魏非後周也時府境屬東魏而西魏亦別設汾州
同名異地說詳沿革及職官

汾州府志 卷十一 七
李衍字拔豆遼東襄平人開皇元年以行軍總管討叛蠻平之進位柱國明年突厥犯塞以行軍總管率衆討之不見虜而還轉介州刺史後數年朝廷將有事江南詔衍於襄州道營戰船後拜安州總管頗有惠政歲餘以疾還京師

蕭大圜字仁顯梁簡文帝之子也幼而聰敏神情俊悟年四歲能誦論語孝經及三都賦七歲居母喪便有成人之性梁大寶元年封樂梁郡王屬侯景肆虐簡文見弒大圜潛逃獲免明年景平大圜歸建康改封晉熙郡王大圜以世多故恐讒愬生焉恒以讀詩禮書易爲事

元帝嘗問五經要事數十條大圜辭約指明應答無滯帝甚歎美之隋開皇初拜內史侍郎出爲西河郡守大圜性好學務於著述撰梁舊事三十卷寓記三卷士喪儀注五卷要決兩卷并文集二十卷

韋沖字世沖京兆杜陵人世爲關右著姓高祖踐阼賜爵安固縣侯歲餘長城之役發南汾州部衆千餘人在塗皆亡上以沖嘗安集稽部呼沖問計沖曰臣請以理綏靜可不勞用兵而定上然之因命沖綏懷叛者月餘皆至並赴長城上下書勞勉之尋拜石州刺史甚得諸部歡心以母憂去職仁壽中卒

段襄侯文振北海期原人少有膂力膽氣過人性剛直明達時務開皇中爲石州刺史甚有威惠後遼東之役卒於師贈光祿大夫尚書右僕射北平侯謚曰襄

薛道實汾東汾陰人道衡之從父弟也官至禮部侍郎離石太守知名於世

楊子崇高祖族弟也少好學有風儀愛賢好士開皇初拜儀同以車騎將軍恒典宿衛煬帝嗣位從帝幸汾陽宮子崇知突厥必爲寇患屢請早還京師帝不納尋有雁門之圍及賊退出爲離石郡太守治有能名唐義旗初兵夜至城下城陷子崇爲讐家所殺

李德侶趙郡柏人人父純開皇中爲介州長史兄德饒至孝甘露降於庭樹有鳩巢其廬德侶性重然諾大業未爲離石郡司法書佐太守楊子崇特禮之及義兵起子崇遇害棄尸城下德侶赴哭盡哀收瘞之至介休詣義師請葬子崇大將軍嘉之因贈子崇官令德侶爲使者往離石禮葬子崇焉

右隋七人

王儉武德初石州刺史二年劉季真叛陷石州儉死之薛大鼎字重臣蒲州汾陰人父粹爲隋介州長史義旗初大鼎於龍門謁高祖以功遷浩州刺史累徙滄州是

沈州府志 卷十
時鄭德本在瀛州賈敦頤爲冀州皆有治名故河北稱
錙脚刺史永徽中遷銀青光祿大夫行荊州大都督長
史卒謚曰恭

舒王李元名高祖第十八子也貞觀五年封譙王十一
年徙封舒王拜壽州刺史後歷滑許鄭三州刺史二十
三年轉石州刺史元名性高潔罕問家人產業朝夕矜
莊門庭清肅常誡其子豫章王亶等曰藩王所乏者不
慮無錢財官職但勉行善事忠孝持身此吾志也及亶
爲江都刺史以善政聞高宗手勅褒美元名以賞其義
方之訓高宗每欲授元名大州刺史固辭曰忝預藩戚

豈以州郡戶口爲仕進之資辭情懇到故在石州二十
年賞翫林泉有塵外之意永昌中與子亶俱爲邱神勣
所陷被殺神龍初贈司徒仍令以禮改葬

楊越宏農仙掌人太宗初定天下網羅遺逸越曰天下
有道可以出而見矣以角巾褐衣應命陳謨太宗曰石
州邊方未沾王化汝往輯禦以息邊患授石州方山令
魯王李道堅靈夔之孫也神龍初嗣魯王性嚴整雖在
閨門造次必於莊敬景龍四年加銀青光祿大夫歷果
隴吉冀洛汾滄汴八州刺史以清毅聞入爲宗正卿薨
贈禮部尚書

汾州府志 卷一
楊隆禮煬帝曾孫景雲中汾州刺史性清嚴能檢察人吏欺隱殆絕開元中封宏農郡公授戶部尚書卒

崔隱甫貝州武城人隋散騎侍郎儵之曾孫也解褐左玉鈐衛兵曹參軍遷殿中侍御史內供奉浮圖惠範倚太平公主勝人子女隱甫劾狀反爲所擠貶邕州司馬元宗立擢汾州長史兼河東道支度營田使遷洛陽令梨園弟子胡鷄善笛有寵嘗負罪匿禁中帝以他事召隱甫從容指曰就卿丐此人對曰陛下輕臣而重樂工請解官再拜出帝遽謝與胡鷄隱甫殺之有詔貫死不及矣賜隱甫百緡後拜東都留守封清河郡公卒贈益

州大都督謚曰忠隱甫所至潔介自守明吏治以強正稱始帝欲相隱甫也謂曰牛仙客可與語卿常見否對曰未也帝曰可見之隱甫終不詣他日又問對如初帝乃不用

徐堅字元固湖州長城人世客馮翊梁慈源侯整五世孫也堅幼有敏性沛王聞其名召見授紙爲賦異之十四而孤及壯寬厚長者舉秀才及第爲汾州參軍事後累遷給事中封慈源縣子睿宗初進東海郡公元宗改麗正書院爲集賢院以堅充學士副張說知院事帝大酺集賢幔舍在百司上說令揭大榜以侈其寵堅見遽

命撤之曰君子烏取多尙人堅於典故多所諳識凡七當謨次高選卒贈太子少保謚曰文

楊仲昌字蔓號州閩鄉人元琰之子也開元中對策第一授蒲州法曹參軍判入異等遷監察御史坐累左遷孝義令鸞降庭樹太守蕭恕表其政徙下邳終吏部郎中仲昌資長於吏常分父邑租振宗黨御身以約善與人交士樂從之游

杜希望京兆萬年人重然諾所交游皆一時俊傑屬吐蕃攻勃律勃律乞歸右相李林甫方領隴西節度故拜希望鄯州都督知留後馳傳度隴破烏菴衆斬千餘級

進拔新城振旅而還擢鴻臚卿於是置鎮西軍希望引師部分塞下虜悉與爭壇泉希望大小戰數十俘其大酋至莫門焚積蓄卒城而還授二子官宦者牛仙童行邊或勸希望結其驩答曰以貨藩身吾不忍仙童還奏希望不職下遷恒州刺史徙西河太守而仙童受諸將金事泄抵死畀金者皆得罪希望愛重文學門下所引如崔顥等皆名重當時

陸瓌字仲采蘇州吳人舉明經補長安尉以清幹稱開元初改新鄉令人爲立祠後除洛陽令時車駕在洛摧勅姦豪人不敢犯爲中書令蕭嵩所器嵩罷他宰相俾

汾州府志卷十
陰廉嵩短瑛曰與人交過且不可言況無有邪以是忤
貴近出爲太原少尹累徙西河太守封平恩縣男屬邑
多虎前守設楹窵瑛至徹之而虎不爲暴

薛從字順之絳州龍門人仁貴之四世孫以蔭授左清
道率府兵曹參軍累遷汾州刺史隄文谷瀘河二水引
溉公私田汾人利之徙濮州儲粟二萬斛以備凶災擢
將作監終左領軍衛上將軍贈工部尙書

崔昭襄圓字有裕貝州武城人開元中以鈐謀對策甲
科累遷爲劔南左司馬知留後元宗西出次扶風遷御
史中丞劔南節度副大使圓初聞難治城浚隍列館宇

儲什具帝次河池圓疏具陳蜀土腴穀羨儲供易辦帝
省書泣下曰世亂識忠臣卽日拜中書侍郎同中書門
下平章事仍兼劔南節度使至德二載遷中書令封趙
國公後削階封李光弼表爲懷州刺史改汾州以治行
稱徙淮南節度使卒謚昭襄

李貞簡勉字元卿鄭惠王元懿曾孫也勉少喜學內沈
雅外清整始調開封尉汴州水陸一都會俗屢錯號難
治勉摧姦決隱爲有名從肅宗於靈武擢監察御史遷
司膳員外郎關東獻俘百將卽死有歎者勉過問曰被
脅守官非敢反勉入見帝曰寇亂之汙半天下其欲澡

心自歸無繇如盡殺之是驅以助賊也帝馳騎完宥後歸者日至天子素重其正擢太常少卿欲遂柄用而李輔國諷使降禮於已勉不爲之屈乃出爲汾州刺史興元初拜檢校司徒平章事卒贈太傅謚曰貞簡勉少貧客梁宋與諸生共逆旅諸生疾且死出白金曰左右無知者幸君以此爲我葬餘則君自取之勉許諾旣葬密置餘金棺下後其家謁勉共啟墓出金付之位將相所得俸賜悉遺親黨身歿無贏藏其在朝鯁亮廉介爲宗臣表禮賢下士有始終嘗引李巡張參在幕府後二人卒宴飲仍設虛位沃饋之遣戍兵常視其資糧春秋存

問家室故能得人死力善鼓琴有所製天下寶之

賈元靖耽字敦詩滄州南皮人天寶中舉明經河東節度使王思禮署爲度支判官累進汾州刺史治凡七年政有異績召授鴻臚卿兼左右威遠營使貞元九年以尙書右僕射同中書門下平章事封魏國公卒贈太傅謚曰元靖耽嗜觀書老益勤尤悉地理爲圖廣三丈從三丈三尺以寸爲百里本之禹貢及班固漢書古郡國題以墨今州縣以朱刊落疎舛多所釐正又著貞元十道錄其器條然蓋長者也不喜臧否人物檢身勵行家人近習不見其喜愠

劉暹曹州南華人爲汾州刺史天資疾惡所至以方直爲觀察使所畏建中末召爲御史大夫宰相盧杞憚其嚴更薦前河南尹于頔代之暹終潮州刺史

孔巢父字弱翁少力學隱徂來山建中初涇原節度留後孟皞表巢父試秘書少監兼御史中丞行軍司馬尋拜汾州刺史入爲諫議大夫興元中李懷光擁兵河中巢父兼御史大夫充宣慰使遇害帝聞之震悼贈尙書左僕射

李說字巖甫淮安靖王神通之五世孫也馬燧節度太原辟說署少尹遷汾州刺史李自良代燧復奏爲少尹

擢檢校禮部尙書節度使累封隴西縣男說精於職卒贈尙書右僕射

裴向字僚仁絳州聞喜人父遵慶上元中同平章事廣德初僕固懷恩阻兵汾上代宗以遵慶忠純特遣往汾州宣慰見懷恩具陳朝旨懷恩引過聽命將隨入朝旋爲范志誠所惑以懼死爲辭會乘輿幸陝遵慶自汾州奔赴行在向少以門蔭歷官至太子少議郎德宗末方鎮之副多自選於朝以待有變次授之故向以選爲太原少尹行軍司馬兼御史中丞改汾州刺史轉鄭州向以學行自飭歷官仁智推愛利及於人以吏部尙書致

仕內外親屬百餘人向所得俸祿必同其費世稱其孝
睦

李漢字南紀雍王八世孫少事韓退之通古學屬詞雄
蔚爲人剛烈類愈愈愛重以子妻之擢進士第累遷右
拾遺直諫多所救補出佐興元幕府文宗立召爲屯田
員外郎史館修撰論次憲宗實錄書宰相李吉甫事不
假借子德裕惡之會李宗閔當國擢知制誥進御史中
丞吏部侍郎後德裕復輔政漢坐宗閔黨出爲汾州刺
史有善政及宗閔再逐改州司馬尋徙絳州長史大中
時召拜宗正少卿

魏謩字申之鉅鹿人文貞五世孫也擢進士第文宗讀
貞觀政要思魏徵賢詔訪其後以謩爲右拾遺謩姿宇
魁秀帝異之累擢諫議大夫以直諫稱始謩之進李珣
楊嗣復寔推引之武宗立坐二人黨出爲汾州刺史後
大中五年進同中書門下平章事十年以平章事領劍
南西川節度使卒贈司徒謩爲宰相議事天子前他相
或委抑規諷惟謩讜切無所回畏宣示嘗曰謩名臣孫
有祖風朕心憚之然卒以剛正爲令狐綯所忌讒罷之
右唐二十人舊志於名宦祠列唐汾陽王郭子儀汾
州刺史李說西河太守陸瓌汾州刺史賈耽李漢李

勉崔宏禮於孝義縣名宦祠列孝我令楊仲昌唐時此地無汾陽之稱說詳沿革崔宏禮史但云擢忻汾二州刺史而其傳未有云宏禮短於治民多愛利晚頗務多積素議疵之夫短於治民在州郡之官已不足稱能吏矣至以愛利務多積見譏猶列之祀典何以示官箴儆凡居官者哉志是以去而不錄

李謙溥字德明并州孟縣人性慷慨重然諾少通左氏春秋建隆四年爲慈州刺史兼晉隰緣邊都巡檢行石州事以興同寨爲治所開寶元年命李繼勳等征太原以謙溥爲汾州路都監太祖征晉陽爲東寨都監前軍

副部署黨進遣謙溥伐木西山以給軍用未至聞鼓聲乃并人逼西寨大將趙贊禦之并衆未退謙溥麾所部赴之太祖遽至觀戰怪其赴援者非精甲問之乃謙溥也帝甚喜謙溥在州十年敵人不敢犯境有招收將劉進者勇力絕人謙溥撫之厚藉其死力往來境上以少擊衆并人患之爲蠟丸書以間進佯遺書道中晉帥趙贊得之以聞太祖令械進送闕下謙溥詰其辜進伏請死謙溥曰我以舉宗四十口保汝矣卽上言進爲并人所惡此乃反間也奏至帝悟遽令釋之賜以禁軍都校戎帳服具進感激願擊敵自効

杜正獻衍字世昌越州山陰人衍總髮苦志厲操尤篤於學擢進士甲科補揚州觀察推官改秘書省著作佐郎知平遙縣使者薦之通判晉州詔舉良吏擢知乾州徙權知鳳翔府及罷歸二州民邀留境上曰何奪我賢太守也以太常博士提點河東路刑獄高繼昇知石州人告繼昇連蕃旅謀變逮捕繫治久不決衍辨其誣抵告者罪後拜同平章事集賢殿大學士兼樞密使衍好薦引賢士而沮止僥倖小人多不悅皇祐初封祁國公衍清介不殖私產既退寓南都凡十年第室卑陋才數十楹居之裕如也善爲詩正書行草皆有法卒贈司徒兼侍中謚正獻戒其子努力忠孝自作遺疏曰無以久安而忽邊防無以旣富而輕財用宜早建儲以安人心語不及私

王益柔字勝之河南人伉直尙氣喜論天下事用蔭入官杜衍丁度宣撫河東益柔寓書言河外兵饑無法非易帥臣轉運使不可因條其可任者衍度使還以學術政事薦知介休縣范仲淹未識面以館閣薦之除集賢校理至知制誥兼直學士院益柔少力學通羣書爲文日數千言時方以詩賦取士益柔去不爲范仲淹薦試館職以其不善詞賦乞試以策論特聽之

郭達字仲通其先自邢徙洛康定中兄遵死於敵錄達爲三班奉職隸陝西范仲淹麾下仲淹勉以問學及爲汾州都監龐籍鎮河東俾權知忻州契丹來求天池廟地籍不能決以誘達達訪得太平興國中故牘證爲王土檄報之契丹愧服達愷慷喜兵學尤善用偏裨每至所部令人自言所能暇日閱按之故臨陣皆盡其技每戰先招懷後戰鬪愛惜士卒不妄加誅戮其殺賊婦女老弱者皆不賞後官左武衛上將軍提舉崇福宮卒贈雄武軍節度使

趙懿簡瞻字大觀其先亳州永城人父剛太子賓客徙鳳翔之盩厔瞻舉進士第調孟州司戶參軍知夏縣作八監堂書古賢令長治迹以自監又以秘書丞知永昌縣築六堰灌田歲省科斂數十萬水訟咸息民以比召杜英宗治平初自都官員外郎除侍御史時議追崇濮安懿王瞻引漢師丹董宏事謂其屬薛溫其曰事將類此吾必以死爭固吾所也中書請安懿王稱親瞻爭曰仁宗旣下明詔子陛下議者顧惑禮律所生所養之名要相訾難彼明知禮無兩父貳斬之義敢裂一字之詞以亂厥真且文有去婦出母者去已非婦出不爲母辭窮直書豈足援以斷大義哉臣請與之庭辨以定邪正

已而皇太后手書尊王爲皇。瞻歎曰：向者太后切責大臣，議乃得罷。今邪臣與中官交締，歸過至尊而自爲之地。吾與首議之臣不並生矣。因復力陳。會假太常少卿，接契丹賀正使入對。英宗問前事，對曰：陛下爲仁宗子，而濮王又稱皇考，則是二父。二父非禮。英宗曰：御史嘗見朕欲皇考濮王乎？瞻曰：此乃大臣之議。陛下未嘗自言。英宗曰：是中書過耳。朕自數歲時，先帝養爲子，豈敢稱濮考？瞻曰：臣請退論。中書作詔以曉天下。時連日晦冥，英宗指天示瞻曰：天道如此，安敢妄爲褒尊？朕意已決，無庸宣告。瞻曰：陛下祇畏天戒，不以私妨公，甚盛德。

也。及使還，聞呂誨等諫濮議皆罷去，乞與同貶，不報。趣入對。英宗曰：卿欲就龍逢比干之名，孰若効伊尹傳說哉？瞻皇懼，言臣不敢奉詔。使朝廷有同罪異罰之譏，遂通判汾州。神宗卽位，遷司封員外郎，知商州。元祐三年，擢樞密直學士，簽書樞密院事。明年，以中大夫同知院事。五年卒。太皇太后語輔臣曰：惜哉！忠厚君子也。車駕親臨，贈銀青光祿大夫，謚曰懿簡。

呂大忠字進伯，其先汲郡人。祖通，太常博士，葬京兆藍田。遂家焉。登第，累官簽書定國軍判官。熙寧中，王安石議遣使諸道立緣邊封溝，大忠陳五不可，罷不遣。令與

劉忱使契丹議代北地會遭父喪起服知代州契丹使蕭素梁穎至代設次據主席大忠與之爭乃移次於長城北換西上閤門使知石州大忠數與素穎會凡議屢以理折之素穎稍屈已而復使蕭禧來求代北地神宗召執政與大忠忱議將從其請大忠曰彼遣一使來卽與地五百里若使魏王英弼來求關南則何如神宗曰卿是何言也對曰陛下旣以臣言爲不然恐不可啟其漸忱曰大忠之言社稷大計願陛下熟思之執政知不可奪議卒不決罷忱還三司大忠亦終喪制其後竟以分水嶺爲界焉元祐初歷工部郎中陝西轉運副使知

陝州以直龍圖閣知秦州進寶文閣待制馬涓以進士舉首入幕府自稱狀元大忠謂曰狀元云者及第未除官之稱也旣爲判官則不可今科舉之習旣無用修身爲已之學不可不勉又教以臨政治民之要涓自以爲得師焉

田晝字承君陽翟人樞密使況之從子以任爲檢書郎調磁州錄事參軍知西河縣有善政民甚德之議論慷慨有前輩風與鄒浩以氣節相激勵元符中浩爲諫官晝監京城門往見浩曰平生與君相許者何如今君爲何官浩曰上遇羣臣未嘗假以辭色獨於浩差若相喜

天下事固不勝言意欲待深相信而後發貴有益也晝然之既而以病歸許邸狀報立后晝謂人曰志完不言可以絕交矣浩得罪晝迎諸塗浩出涕晝正色責曰使志完隱默官京師遇寒疾不汗五日死矣豈獨嶺海之外能死人哉願君毋以此舉自滿士所當爲者未止此也浩茫然自失謝曰君之贈我厚矣建中靖國初入爲太宗正丞曾布數羅致之不爲屈

張確字子固邠州宜祿人元祐中擢進士第徽宗卽位應詔上書言十事乞誅大姦退小人進賢能開禁錮起老成擢忠鯁息邊事修文德廣言路容直諫遂列於上籍宣和中知汾州七年徙解州又徙麟德府明年金兵至確乘城拒守或獻謀欲自東城潰圍出且探確意確怒叱曰確守土臣當以死報國頭可斷腰不可屈乃戰而死欽宗聞之悲悼優贈述古殿直學士召見其子密慰撫之曰卿父今之巡遠也爲將爲守者皆如卿父朕顧有今日邪歛容歎息者久之

張忠確克戡字德祥開封人侍中耆曾孫也第進士宣和七年八月知汾州十二月金兵圍太原距汾二百里遣將銀木字莖來攻縱兵四掠克戡畢力扞禦數選勁卒撓敵營出不意焚其柵敵懼引去論功加直秘閣靖

康元年六月金兵復逼城朝廷命經畧使張孝純之子
灝都統制張思正轉運使李宗來援思正誅求無藝民
不堪命克戡引誼開曉皆願自奮宣撫使李綱表其守
城勞連進直龍圖閣右文殿修撰太原不守思正紿云
出戰遂率灝宗奔慈隰於是人無固志戍將麻世堅夜
斬關出通判韓琥相繼亡克戡召令兵民曰太原旣陷
吾固知亡矣然義不忍負國家辱父祖願與此城始終
以明吾節諸君其自爲謀皆泣不能仰視同辭對曰公
父母也願盡死聽命乃益厲兵儆守金兵至身帥將士
擐甲登陴雖屢却敵而援師訖不至金兵破平遙平遙

爲汾大邑久與抗旣先陷又脅降介休孝義諸縣據州
南二十村作攻城器具兩遣使持書諭克戡焚不啟具
述危苦狀募士間道言之朝不報十月朔金益萬騎來
攻愈急有十人唱爲降語斬以徇諸酋列城下克戡臨
罵極口砲中一酋立斃度不得免手草遺表及與妻子
遺書緹州兵持抵京師明日金兵從西北隅入殺都監
賈直克戡猶率衆巷戰金人募生致之克戡歸索朝服
焚香南向拜舞自引決一家死者八人金將奉其屍禮
葬於後園羅拜設祭爲立廟事聞詔贈延康殿學士賜
銀三百兩絹五百匹表揭門閭紹興中謚忠確

賈亶汾州路兵馬都監靖康元年十月庚子金人陷汾州亶巷戰死

陳膏莆田人政和中進士宣和中爲汾州教授佐守臣張克戩守城捍禦有功後知惠州

徐忠壯徽言字彥猷衢之西安人少爲諸生汎涉書傳負氣豪舉有奇志大觀二年詔求材武士韓忠彥范純粹劉仲武以徽言應詔召見崇德殿賜武舉絕倫及第屢著邊功知火山軍兼統制河西軍馬徙赴石州靖康初遷武翼郎閤門宣贊舍人金人圍太原分兵絕饗道自隰石以北命令不通者累月徽言以三千人渡河一

戰破之遷武經郎知晉寧軍兼嵐石路沿邊安撫使建炎二年金兵圍晉寧當是時河東皆已陷獨徽言保守孤墉堅壁持久撫摩疲傷與金人大小數十戰所俘殺過當徽言能得衆心奮枵餓傷夷之餘哀折槊斷刃以死固守遣人間道馳書其兄昌言曰徽言孤國恩死矣兄其勉事君及城陷徽言置妻子室中積薪自焚伏劍坐堂上慷慨語將士我天子守土臣義不見讎敵手因拔佩刀自擬左右號救持之急金兵狎至挾徽言以去金將婁宿就見徽言語曰二帝北去爾爲誰守此徽言曰吾爲建炎天子婁宿曰我兵已南矣中原事未可知

何自苦爲徽言怒曰吾恨不死汝輩歸見天子將以死報太祖太宗地下庸知其他金人知不可屈遂射殺之事聞高宗撫几震悼顧謂宰相曰徐徽言報國死封疆臨難不屈忠貫日月乃贈晉州觀察使謚忠壯再贈彰化軍節度子岡旣同死事而從孫適亦以守安豐死世著忠義

右宋十二人舊志於名宦祠列汾州通判趙瞻贈延康殿學士忠確公前汾州知州張克戩汾州路都監李謙溥於平遙縣名宦祠列丞相少師祁國正獻公前平遙尹杜衍於永寧州名宦祠列知石州軍徐徽

言而山西通志於名宦列陳寅西河守與妻杜氏死難考陳忠義乃理宗紹定初知西和州守城死上距靖康初汾州西河入於金凡百有三年和字史文不誤改而入此且加以西河守之稱尤屬失檢

郭企忠字元弼唐汾陽王子儀之後企忠幼孤事母孝謹年十三居母喪哀毀如成人天輔中大軍至雲中遣邪律坦招撫諸部企忠來歸軍帥命同勾當天德軍節度使事及見太祖問知其家禮遇優厚天會四年知汾州事是時汾州初下居民多爲軍士掠去城邑蕭然企忠詣帥府力請願聽其親舊贖還帥府從之未幾完實

如故石州賊閻先生衆數萬至城下僚屬慮有內變請
爲備企忠曰吾於汾人有德保無他乃率吏民城守會
援至合擊破之六年遷天德軍節度使後累遷金吾衛
上將軍

董文定師中字紹祖洛州人少敏贍好學強記擢皇統
九年進士第調澤州軍事判官改平遙丞縣有劇賊王
乙素凶悍不可制師中捕得杖殺之一境遂安時大軍
後野多枯齒縣有遺櫬寓於驛舍者悉爲葬之遷綿上
令官至參知政事進尙書左丞師中通古今善敷奏練
達典憲處事精敏嘗言曰宰相不當事細務要在知人

才振綱紀但一心正兩日明足矣其平居樂易真率臨
事則剛決挺然不可奪泰和二年薨謚文定

傅慎徽大定中知汾州州東十里有西河灤卽古文湖
圍四十里歲旱以溉民田雨以瀦水宋時轉運使王沿
廢爲田熙寧元年御史劉述因民不以爲便請復之至
是有欲涸以爲田者慎徽力爲嚴禁及代去後卒廢灤
耕種其中自是傍近之田多旱暵之虞而灤地本污下
遇雨久輒致淹浸

完顏宗璧宗室子少恬靜好學以賢雅稱大定中同知
石州軍事廉潔自持有聲譽及代去父老作去思堂於

盧橋瑞石之東繪其像堂壁。

郭震字伯起河間人大定中爲定胡令勸學課農滌除積弊及代去縣人感其仁恩立生祠於興覺院祀之。

劉文通大定中爲平夷主簿以治行祀名宦祠。

許文簡安仁字子靜獻州交河人登大定七年進士第侍御史賈鉉以安仁守道端慤薦於朝同知濟南府事路伯達繼上章言其立已純正宜加顯任明昌中爲汾陽軍節度使泰和五年卒謚曰文簡安仁質實無華澹然有古君子風爲時人所稱。

石抹元毅本名神思咸平府路酌赤烈猛安莎果歌仙謀克人明昌中以最遷汾陽軍節度副使時石嵐間賊黨嘯聚肆行剽掠朝廷命元毅捕之賊畏而遁元毅追襲盡殪之二境以安遷同知武勝軍節度使事別郡有殺人者屢鞠不伏元毅訊不數語卽具服河東北路田多山坂磽瘠大比時定爲上賦民力久困朝廷命相地更賦元毅以三壤法平之民賴其利後戰歿於撫州贈信武將軍元毅性沉厚武勇過人每讀書見古人忠義事未嘗不嗟歎賞慕喜動顏色。

高汝勵字巖夫應州金城人登大定十九年進士第蒞官有能聲明昌五年九月章宗詔宰執舉奏中外可爲

沙州府志 卷十一
刺史者上親閱闕點注蓋取兩員同舉者升用之於是
汝勵自同知絳陽軍節度事起爲石州刺史承安元年
七月入爲左司郎中在朝多所陳奏皆明利病切機宜
爲人慎密廉潔貞祐二年拜參知政事正大元年薨年
七十一配享宣宗廟

宋德玉泰和中爲寧鄉令以治行祀名宦祠

胥鼎字和之尚書右丞持國之子也大定二十八年擢
進士第八官以能稱至寧初由戶部尚書拜參知政事
貞祐二年五月宣宗將南度留爲汾陽軍節度使兼汾
州管內觀察使十一月改知平陽府事兼河東南路兵

馬都總管權宣撫使三年拜樞密副使權尚書左丞行
省於平陽宰相高汝勵言於帝曰胥鼎才擅衆長身兼
數器宜召還朝省四年進封溫國公致仕元光元年晉
陽公郭文振奏河朔受兵有年矣向皆秋來春去今已
盛暑不廼且不嗜戕殺恣民耕稼此殆不可測也伏見
前平章政事胥鼎才兼將相威望甚隆向行省河東人
樂爲用今雖致政精力未衰乞付重兵使總制公府同
力戰禦庶幾人皆響應易爲恢復惟陛下圖之正大二
年起復拜平章政事進封英國公行尚書省於衛州鼎
力疾赴鎮來歸者衆三年七月薨鼎通達吏事有度量

為政鎮靜所在無賢不肖皆得其懽心

烏古論德升本名六斤益都路猛安人明昌二年進士以翰林侍讀權參知政事與平章政事抹撚盡忠論近侍局預政宣宗怒未幾出為集慶軍節度使改汾陽軍節度使河東北路宣撫副使復改知太原府事興定元年德升上言皇太子聰明仁孝保訓之官已備更宜選德望素著之士朝夕左右之日聞正言見正行此社稷之洪休生民之大慶也宣宗嘉納之二年元兵圍太原城破德升至府署謂其姑及其妻曰吾守此數年不幸力窮乃自縊而死其姑及其妻皆自殺詔贈翰林學士

承旨方貞祐中近侍局陰秉朝政及德升罷相盡忠下獄自是以後中外蔽隔以至於亡

完顏訛出虎隆安府猛安人大定二十八年進士累官補尚書省令史由忻州防禦使遷汾陽軍節度使兼經畧使興定二年九月蒙古木華黎破汾州出虎力戰死劉撟石州刺史無事蹟可考

右金十四人舊志於名宦祠列平章事莘國公前汾陽軍節度使胥鼎汾陽軍節度使石抹元毅於平遙縣名宦祠列少中大夫廣川伯前平遙縣丞董師中於永寧州名宦祠列石州孟門縣令郭震石州刺史

劉撫同知石州軍州事完顏宗璧戶部尙書前石州
刺史高汝勵於寧鄉縣名宦祠列寧鄉簿劉文通寧
鄉令宋德玉案胥平章封英國公此作莘國公蓋轉
寫之訛劉撫無事迹可考永寧州志亦僅記姓名而
繫之嘉靖六年知州張經之後十年知州李昇之前
豈別有所見歟然舊府志成於明萬曆三十七年已
僅留姓名而已似屬歲遠事湮者今仍據舊志列之
陳資壽錦州永樂人仕蒙古國既取寧鄉資壽以監軍
駐焉勦捕羣寇綏輯人民其後遂家於是歷官昭毅大
將軍

高岡字陟夫寧鄉人元初爲本縣尉尋遷石州軍判中
統元年同知石州岡達民情精吏事民德之

梁瑜平遙人金評事秉鈞之子至元初爲本縣尹居官
寬仁吏民懷之卒於官弟琮繼任未幾卒兄瑛之季子
天翔繼任每具酒食召父老數輩訪以民間利病所宜
可而行之至元九年授從仕郎尹介休縣當孔道驛使
供應不擾設學明農以重教養會簡兵編戶以戍南方
天翔第其衆寡甲乙爲伍咸稱平公官終四川道肅政
廉訪使

周景福南陽人至元中知石州寬厚愛民政簡刑清教

養兼舉居三載民和歲豐有嘉禾同穎之瑞及代去吏民鐫石紀之

王翼甫平陽人大德六年尹平遙縣有廉操代去後民懷其善政

郭琪繁峙人延祐初知汾州以才能稱增秩朝列大夫睦大用神峰人延祐中同知汾州廉正有威吏民守法畏服

齊思古榆次人至順二年尹平遙縣撫愛其民爲興利除害及去任民懷之不能忘

楊乘字文載濱州渤海人至正八年爲介休縣尹民饑

散爲盜乘立法招之使自新皆棄兵頓首願爲良民其後累官浙江行省左右司員外郎坐海寇掠漕舟免官寓居松江張士誠入平江其徒郭良弼董綬言乘於士誠士誠遣張經招乘乘曰良弼綬皆名臣今已失節顧欲引我以濟其惡邪且讓經平日讀書云何經俛首不能對乘日與客痛飲竟日不言客問盍行乎乘曰乘一小吏致身顯官有死而已尙何行之有經促其行愈急乘乃整衣冠自經死年六十四

李朝英孟縣人至正間判汾州有政績

韓謙河南人至正間尹平遙縣公勤廉慎三年如一日

嘗被朝命問理賊黨滌除冤濫得活者數百家代去後民撰德政碑頌之。

高本冀路人至正間尹平遙縣廉正愛民民於其去撰德政碑樹之洪善驛。

蔡演至正中爲寧鄉尹持身清慎善政治於民。

馬麟至正二十六年知臨州開誠率物在官有政績。

朱守謙河南汝寧人至正中寇入孝義焚劫甚慘守謙由總兵都鎮撫司經歷署孝義縣事撫傷殘恤困苦招徠逃潰者復其業又定團練之規設防禦之畧立料差之等開渠堰之利不數月民若更生乃共立石以表功

德

程邦彥祁邱人同知汾州郡人德之及去撰遺愛碑。

武弁少通書史年十八爲平遙尹有善政歷官少中大夫。

宋景初爲寧鄉尹有善政吏清民化。

右元十九人舊志於名宦祠列朝列大夫知石州郭琪汾州同知睦大用程邦彥汾州判官李朝英於平遙縣名宦祠列平遙尹韓謙王翼甫齊思古高本於介休縣名宦祠列介休尹楊乘於孝義縣名宦祠列都鎮撫司經歷朱守謙於永寧州名宦祠列知石州

周景福石州同知高岡於寧鄉縣名宦祠列寧鄉尹
宋景初蔡演

汾州府志卷之十一

宦績下

殷近仁嘉興人洪武初舉孝弟知平遙縣其後獻蒞政
戒銘二十四篇擢廣西參政

顧碩天台人洪武初知石樓縣有治才百廢俱興民服
而悅之

宗秉彝字孝先江南淮安人洪武初為石樓縣主簿有
長材值歲凶賑濟有法民多全活

茹志道洪武八年知汾州勤於治事而閭里不擾民咸
稱之

葉伯巨字居升寧海人弱冠有名於鄉爲諸生通經術舉入國學洪武八年詔選國子監諸生分教北方而伯巨得平遙縣訓導九年星變詔求直言伯巨乃上書其畧曰臣觀當今之事矯枉太過者三分封太侈也用刑太繁也求治太速也今裂土分封使諸王各有分地蓋懲宋元孤立宗室不競之弊而秦晉燕齊梁楚吳蜀諸國無不連邑數十城郭宮室廣狹大小亞於天子之都優之以甲兵衛士之盛臣恐數世之後尾大不掉然後削其地而奪之權則必生舐望甚者緣間而起防之無及矣昔賈誼勸漢文帝盡分諸國之地空置之以待諸

王子孫願及今諸王未之國之先節其都邑之制減其衛兵限其疆理亦以待封諸王之子孫割一時之恩制萬世之利消天變而安社稷莫先於此夫笞杖流徒死今之五刑也用此五刑既無假貸一出乎大公至正可也而用刑之際多裁自聖衷遂使治獄之吏務趨求意旨深刻者多功平反者得罪欲求治獄之平豈易得哉近者特旨雜犯死罪免死充軍又刪定舊律諸則減宥有差矣然未聞有戒敕治獄者務從平恕之條是以法司猶循故例雖聞寬宥之名未見寬宥之實所謂實者誠在主上不在臣下也故必有罪疑惟輕之意而後好

生之德洽於民心。古之爲士者，以登仕版爲榮，以罷職不敘爲辱。今之爲士者，以溷跡無聞爲福，以受玷不錄爲幸。以屯田工役爲必獲之罪，以鞭笞捶楚爲尋常之辱。其始也，朝廷取天下之士，網羅摭撫，務無餘逸。有司敦迫上道，如捕重囚。比到京師，而除官多以貌選，所學或非其所用，所用或非其所學。洎乎居官，一有差跌，苟免誅戮，則必在屯田工役之科。率是爲常，不少顧惜。此豈陛下所樂爲哉？誠欲人之懼而不敢犯也。竊見數年以來，誅殺亦可謂不少矣。而犯者相踵，良由激勸不明，善惡無別。議賢議能之法，旣廢，人不自勵而爲善者怠。

也有人於此，廉如夷齊，智如良平，少戾於法，上將錄長，棄短而用之乎？將舍其所長，苛其所短而置之法乎？苟取其長而舍其短，則中庸之材，爭自奮於廉智。倘苛其短而棄其長，則爲善之人，皆曰：某廉若是，某智若是。朝廷不少貸之，吾屬何所容其身乎？致使朝不謀夕，棄其廉耻，或事掊克以備屯田工役之資者，率皆是也。臣願自今朝廷宜存大體，赦小過，明詔天下修舉八議之法，嚴禁深刻之吏，斷獄平允者，超遷之；殘酷哀斂者，罷黜之。如此則足以隆好生之德，樹國祚長久之福，而兆民自安，天變自消矣。孔子曰：如有王者，必世而後仁。此非

空言也。求治之道，莫先於正風俗。正風俗之道，莫先於守令。知所務，使守令知所務，莫先於風憲。知所重，使風憲知所重，莫先於朝廷。知所尚，今之守令，以戶口錢糧獄訟爲急務，至於農桑學校，王政之本，乃視爲虛文，而置之。將何以教養斯民哉？以農桑言之，方春州縣下一白帖，里甲回申文狀而已。守令未嘗親視種藝次第，旱澇戒備之道也。以學校言之，今四方師生缺員甚多，縱使具員，守令亦鮮有以禮讓之實作其成器者。朝廷切切於社學，屢行取勘，師生姓名所習課業，乃今社鎮城郭，或但置立門牌，遠村僻處，則又徒存其名。守令不過

具文案，備照刷而已。上官分部按臨，亦但尋習故常，依紙上照刷，未嘗巡行點視也。風紀之司，所以代朝廷宣導德化，訪察善惡，聽訟讞獄，其一事耳。今專以獄訟爲要，但知以去一賊吏，決一獄訟爲治，而不知勸民成俗，使民遷善遠罪，乃治之大者。此守令風憲未審輕重之失也。今天下諸生考於禮部，升於太學，歷練衆職，任之以事，然而升於太學者，或未數月，遽選入官，間或委以民社，臣恐其人未暗時務，未熟朝廷禮法，不能宣導德化。上乖國政，而下困黎民也。開國以來，選舉秀才，不爲不多，所任名位，不爲不重。自今數之，在者有幾？臣恐後

之視今亦猶今之視昔昔年所舉之人豈不深可痛惜乎凡此皆臣所謂求治太速之過也書上帝大怒曰小子聞吾骨肉速速來吾手射之既至丞相乘帝喜以奏下刑部獄死獄中先是伯巨將上書語其友曰今天下惟三事可患耳二事易見而患遲一事難見而患速縱無明詔吾猶將言之况求言乎其意蓋謂分封也迨洪武末年燕王屢奉命出塞後因削奪稱兵遂有天下人以伯巨爲能先見

齊政山陽人洪武十一年以進士知孝義縣性勤敏晨起視事無繁劇皆立判暇則循行勸農時曹無廢事獄無滯繫野無曠土民以富庶擢戶部郎中

武信徐州人洪武二十七年知介休縣廉正愛民累官陝西僉事人多思之

紀正隴州人洪武三十五年知汾州有善政累官順天府尹

許孟和鄆縣人洪武中爲石州學正時天下初定學校廢弛孟和修建廟學齋舍朝夕率諸生講質經史凡所造就者入官皆有實效

韓偉崞縣人洪武中知平遙縣政簡不煩而民式化鄭紀中牟人洪武中知石樓縣公正仁明廉操常如一

汾州府志 卷十一
日。衛健，洪武中爲孝義縣丞，讀書習吏治，好言古今忠節事，靖難師起，死之。

張軌，清澗人，永樂初知吉州，起服除汾州，民安其政，任滿奏留，加四品俸，後以疾致仕。

許鼐，永樂十一年知介休縣，廉能果斷，任未滿除，李琬至，琬逼鼐卽遜讓而歸，尋擢陝西御史，琬迎之，禮如舊，鼐亦自若，人服其雅量。

陳道，宣德中知石州，刑清政簡，代去後，民立德政碑頌之。

李善，字元吉，岐山人，以進士，正統初知汾州，持已廉介，察其便於民者，力爲之興舉，遷真定府知府。

閻昇，陳州人，正統二年知介休縣，愛養撫字，因民貧逋逃，爲之申免糧稅，後卒於官，縣之民巷哭。

郭元，正統三年知臨縣，撫愛其民政簡刑清。

王儉，陝西平涼人，正統七年知介休縣，愛民如子，有罪不忍加刑，民亦服其化，獄訟頓減。

梁杲，景泰元年知寧鄉縣，嚴明有才畧，承己巳之變，建城垣以爲保障，民德之。

彭鏞，湖廣石首人，景泰初知介休縣，性廉介，嘗疏通水

利民多賴之。

張雲平谷人。景泰四年以舉人知臨縣。廉潔正直而庭無獄訟。擢濮州知州。

馬榮長汀人。景泰中知石樓縣。有政聲。

汪清固始人。景泰中進士。授監察御史。天順元年以忤權貴左遷。知臨縣。興學校。勸農桑。通水利。減徭役。鋤強梗。旌善良。凡有便於民者。以次修舉。丁憂去。民送之。涕泣於道。

葉穆。閩縣人。以舉人。天順初知汾州。居一年。調吉州。巡撫都御史李侃薦。章言其去汾民思。到吉民悅。廉潔如

水遷河間府同知。

王澤。霑化人。天順三年。知介休縣。法令嚴明。豪強者斂戢。民用以安。

沈純。東平州人。天順五年。知孝義縣。甫下車。卽飾學宮。庀祭器。整壇壝。修城塹。縣有王才里。當西出之路。山徑險隘。艱於行旅。爲隳高堙。下十餘里。間曠坦。可通兼軌。民以負租逃者。招之復業。請蠲其租。旣去。民思之。立遺惠碑。

伍秀。松溪人。以舉人。天順五年。知吉州。尋遷汾州。有賢能。稱詔旌異之。

田愉安化人天順中以舉人知平遙縣清介自持縣素號難治愉蒞事精察民無奸暴

李逢春隴西人以舉人天順中知石州持守廉介政行化洽去後民立嘉政碑

姚昱東昌府人天順中知寧鄉縣性坦易有廉操遇事明決卒於官士民懷之作遺政記

劉鉞撫寧人成化四年知介休縣以廉明稱卒於官

李瓊孟縣人成化十三年以舉人知孝義縣清敏有特操適有中貴過縣橫肆多需索一無所應逼之則徑解衣以奉中貴愕然爲愧謝嘗被誣繫獄事白復蒞縣事

節操益勵

張瓚當塗人成化二十三年以監察御史左遷知介休縣愛民禮士甚著政聲

齊經隆德人以舉人成化中知石州性剛毅善剖斷聲稱大著

呂大川以進士成化中知石州多惠政民俗胥化於厚才寬字汝栗遷安人以進士成化中知石州宏達精敏有經世畧累官兵部尙書

靳亮成化中知寧鄉縣居官廉正

張日升項城人宏治元年以舉人知孝義縣明習吏事

政多修舉

曹鐸字文振嘉祥人宏治初知寧鄉縣在任七年多惠政

海鯉江夏人以進士宏治四年知汾州政尚廉察發姦摘伏如神居一載卒民悲思之

高峻棠邑人宏治四年以舉人知臨縣有節操多善政高俊膚施人以舉人宏治八年同知汾州剛正自任州

北有峽路阻澗多伏盜俊乃伐石塞澗行旅賴以無患陳達遼東人宏治十七年知臨縣剛果有為事至立決

郝槃綏德州人宏治十八年由代州判官遷知介休臨

政剛明事無巨細胥迎刃而解後擢知潞州去之日百姓攀轅泣於道

張恕汧陽人宏治中知平遙縣歷九載仁愛如一日擢知汾州因民安其政奏允食知州俸仍治縣事

王道山東曹縣人以舉人宏治中知石州慈祥愷惻善折獄能令民感化庭累月無人跡莅任九年去民作歌頌之

李昌濮州人正德二年為孝義縣主簿有廉操

李韶開州人正德六年為孝義縣教諭立身清慎教法嚴明諸生有不修其行者輒斥責之士習頓改

李棠清苑人。以舉人正德八年知汾州。慷慨有大節。務實政。惠民。理煩治劇。井井有條。後歷松江太原二府。同知。擢戶部郎中。及卒。貧不能斂。里人葬之。題其碑曰清白吏。

閔以仁。渠縣人。正德八年。自華陰主簿擢知孝義縣。性勤敏。日夜不輟課樹藝。振學校。時給諸生紙筆之費。親校文藝。定其優劣。修廟學。築城浚濠。幹理有餘才。未幾卒於官。士民嘆惜之。

郁浩。湖廣永寧衛人。以進士正德十四年知汾州。政簡嚴。力興學校。每朔望。爲諸生講說經義。不倦。在任三年。

擢戶部員外郎。至按察司僉事。

李承嗣。長安人。正德十四年。以舉人知臨縣。性節儉。歷官六載。終始如一。外和內剛。有古良吏風。

何賢。河間人。以舉人正德十六年知汾州。爲人倜儻。政尙惠和。居歲餘。卒。郡人德之。爲肖像祀焉。

惠賓。清澗人。正德中。知平遙縣。時有邊兵。率士民登城拒守。賴以保全。

王天佑。陝西慶陽衛人。正德中。以舉人知介休縣。少貧。與羣兒牧崆峒。李夢陽遇之。嘆其神俊。授以學。卽能領受。臨魯公帋。卽神似。嘗徵修孝宗實錄。及葭縣事簡要。

汾州府志 卷十一
十一
務存大體而吏民咸畏服如神有分巡道過縣接不以禮天佑怫然解組歸

華震宛平人以舉人正德中知石州廉正愛民

王仁蓋屋人嘉靖初知石樓縣安集流離值歲荒盡心賑濟民感其廉仁

曹昌汲縣人嘉靖初寧鄉縣訓導有學行勤於教士

王崇慶開州人正德戊辰進士以主事抗疏左遷沁州判官嘉靖二年遷分守冀南道以正風俗端士習爲務母老歸養後官至吏部尙書贈太子太保

郭鏗陝西咸寧人以舉人嘉靖二年知汾州爲人深沉

有志操民畏服之擢戶部員外郎累官布政司左參議張軾嘉靖五年知寧鄉縣居官清慎事母以孝聞及母歿扶柩歸葬廬墓踰年卒

羅暉洵陽人嘉靖六年爲孝義縣教諭激勸諸生備極懇至

王正宗固安人以御史謫潞州判官嘉靖七年知介休縣廉潔正直盜賊遠遁擢知汾州

李昇湖廣鈞州人以舉人嘉靖十年知石州勸農桑重教化旌節義去之日百姓皆感泣

陶璽字廷用山東威海衛人嘉靖十二年判石州有清

操明年大饑盜起據劉王嶂諸山憑藉險峻以爲巢穴流劫汾嵐石隰諸郡邑又明年二月二十三日賊犯黃蘆嶺逼吳城璽率部下閻大剛王天佑等往遏之賊聞退保山上璽追至黑暗嶺合戰賊詐北更進來兩山間遇伏璽身被數十創與閻大剛王天佑等六人皆力戰死越旬賊平逮繫州獄璽長子化年甫十五持刀刺賊不得死泣告母陳氏曰父死賊兒竟不得報何以立身天地具疏闕下復念父暴骨異地母弟俱無依急返至壽陽卒於旅邸後覈實璽以遏賊死贈石州知州其長子已死乃錄次子傳入監

趙國良同州人嘉靖己丑進士十二年由工科給事中謫任孝義縣丞多惠政民立石頌其德後擢分巡冀南道

劉坤壽張人嘉靖十五年由萬安縣擢知汾州廉靜愛民值強宗數撓法遂抗疏而歸民懷思之

傅朝用武功人嘉靖十五年爲孝義縣訓導實心勤教人多從學諸生中有貧不能婚葬者時分俸周給之

王錦曲周人嘉靖十七年以舉人知孝義縣因母言肩輿勞民遂改乘馬平易慈愛每延禮諸生講論娓娓不倦

汾州府志 卷十一
唐佑杞縣人。嘉靖十七年爲孝義縣丞。在任七年。廉靜有守如一日。於敖岷州衛人。正德辛巳進士。嘉靖十九年遷分守冀南道。創外城及四鄉堡寨。以資保障。民永賴之。累官大同巡撫。張倌。平涼府人。以舉人嘉靖十九年知汾州。精明果毅。凡強梗病民。力爲杜絕。

孫清愍。繼魯。字道甫。雲南右衛人。嘉靖二年進士。累官知淮安府。織造中官過淮。繼魯與之忤。誣逮至京。大學士夏言救免。繼魯不謝。言不悅。改補黎平。擢湖廣提學。

副使。二十二年進分守冀南道。執法不阿。宗藩畏之。及遷按察使也。民送者塞於道。而宗藩百餘人擁馬發其裝。敝衣外無長物。愕然曰。我高皇祖迄今百七十餘年。罕見此官。乃載酒追送。二十六年擢右副都御史。代楊守謙巡撫山西。繼魯耿介。所至以清節聞。總督都御史翁萬達議撤山西內邊兵。併力守大同外邊。帝報可。繼魯抗章爭言。紫荆居庸山海諸關。東枕溟海。拱護京師。與鴈門寧武偏頭諸關。西據黃河。屏蔽全晉。一也。自偏頭寧武鴈門東抵平刑關。爲山西長邊。自右衛雙溝墩至東陽河鎮口臺。爲大同長邊。自又角山至雙溝百四

十里爲大同緊邊自又角山至老牛灣百四十里爲山西緊邊論長邊則大同爲急山西爲緩論緊邊則均爲最急此皆密邇河套譬之門闔山西守左大同守右山西併力守左尙不能支又安能分以守大同之右使三關將士遠離堡戍欲不侵犯難矣萬達聞之不悅上疏言繼魯以危言相恐復遺臣書帝方倚萬達怒繼魯騰私書引往事遂逮詔下獄疽發於項瘐死繼魯爲巡撫僅閱四月山西人習其前政冀有所設施遽以非罪死咸爲痛惜宗藩有上書訟其冤者卽前奪視其裝者也穆宗卽位贈兵部左侍郎賜祭葬廕一子謚曰清愍

李珊利津人嘉靖二十三年爲孝義縣主簿縣舊有詭寄稅糧積弊而宗藩佃田多遺累珊悉清而正之

葛端肅守禮字與立德平人嘉靖七年舉鄉試第一明年以進士授彰德推官巨盜誣富家株連以百數守禮盡出之主獄者譖之御史會藩府獄久不決屬守禮一訊卽得乃大驚服及爲儀部郎中故事郡王絕近支得以本爵理府事不得繼封交城懷仁襄垣以繼封請守禮持之堅會以疾在告三邸人乘間行賂遂得請旗校詞其事以聞所籍記賂遺十餘萬獨無守禮名帝由是知其廉二十五年遷分守冀南道尋遷按察使累官南

京禮部尙書李本署吏部事希嚴嵩指考察廷臣署守禮下考勒致事後帝問守禮安在左右謬以老病對帝爲歎惜久之隆慶元年起戶部尙書歷刑部尙書左都御史時大學士高拱張居正更用事交相軋守禮周旋其間正色獨立人以爲難卒贈太子太保謚端肅

陸錦灤縣人嘉靖二十六年爲孝義縣教諭申嚴約束諸生之驕惰者面斥警之

耿昕饒陽人嘉靖二十七年知孝義縣剛明有斷任大伯華陰人嘉靖三十二年以舉人知臨縣勤慎慈愛未幾改調民立去思碑

脫鎬清河人嘉靖三十五年以舉人知臨縣勤敏慈仁有善政擢蔚州知州

董愷沔縣人嘉靖三十七年以舉人知孝義縣性惇篤有擔荷

張稽古陝西蒲城人嘉靖三十九年以舉人知平遙縣操履清嚴累官叅議

馬呈書廣平人嘉靖四十三年以舉人知孝義縣周悉民情熟習吏治政平民和擢知大同府

王亮采溧陽人以舉人嘉靖四十三年知石州隆慶元年俺答入寇城陷死之

賀定國，獲嘉人。嘉靖四十四年，以舉人知臨縣。性剛方，有廉操。擢知徽州。去後，民作思慕碑記。

齊宗堯，昌黎人。嘉靖四十五年，知汾州。忠直有胆畧。遇事慷慨直前。隆慶元年，俺答入寇，抵城下。宗堯登埤設守具，指授捍禦。方畧卒得保全。加河東運司同知，仍管汾州事。尋調忻州。

陳情，深州人。嘉靖四十五年，以舉人知孝義縣。操守甚堅，有邊警，竭力捍禦，卒保無虞。

沈振，鄆城人。嘉靖中，以舉人知平遙縣。有節操，始終如一。

葉榮，保安人。嘉靖中，爲孝義縣丞。練習邊事。隆慶丁卯之警，城內人驚怖無措。榮日夜巡戢，恃以無恐。

杜應元，贊皇人。嘉靖中，爲孝義縣主簿。敏斷有才畧。隆慶丁卯邊警後，修城之役，應元毅然任事。民多德之。

侯嘉晏，徽州人。嘉靖中，以舉人知石樓縣。御民以寬，民胥安之。爲歌稱其儉約廉仁。能福庇斯民。後擢河南府通判。

李完，陝西涇陽人。嘉靖中，寧鄉縣典史。性廉潔，自始至終，清操如一日。善折疑獄。雖爲尉，而時人以李青天呼之。

汾州府志 卷十一
劉旁興國州人隆慶元年以舉人知介休縣邊寇大至守禦有法民誦其德

郝綸萬全都司人爲石州學正隆慶元年俺答入寇城陷知州王亮采死之綸與同知甯晉封訓導杜本翰田成郝珊驛丞劉靜同時殉難

李春芳井陘人隆慶初以太原府同知署石州事時州經新破春芳加意撫綏恤死慰生不遺餘力石州之改永寧自是始也

岳維華曲周人隆慶二年以進士知平遙縣剛介不阿廉明白勵設敵樓敵臺以備守禦累官陝西兵備副使

陳翰富順人嘉靖己酉舉人隆慶二年知孝義縣才識明敏剖斷如流賭博及竊盜一時遂絕

高鈞襄城人隆慶五年以舉人知介休縣實心爲民

孟一脈字淑孔東阿人隆慶五年進士六年知平遙縣以廉能擢南京御史直諫忤旨謫建昌推官累遷至南

贛巡撫
石斌臯城人爲石州同知勤於職事吏畏民服

李希思定興人爲石州同知以廉操著稱
王進爲石州學正軌範嚴肅士所式型

董鳳儀以舉人爲石州學正有學有守

汾州府志 卷十一
陳嘉謨長沙人以舉人萬歷三年知永寧州實心愛民有惠政擢楚雄府同知
公一揚蒙陰人萬歷三年以進士知寧鄉縣性端嚴有善政民咸感之累官至郎中
王好賢陝西華亭人萬歷五年知臨縣實心愛民卒於官士民皆巷哭
許天球婺源人以舉人萬歷五年知永寧州守正不阿有聲稱擢紹興府同知
李杜肥鄉人萬歷丁丑進士六年知孝義縣有善政明敏任事

張重恩祥符人萬歷八年知介休縣廉明慈惠民立石志之

郭然咸陽人萬歷八年以舉人知寧鄉縣明達果斷民以神君號之而寬仁不苛

白夏潁川人萬歷十年知汾州治事明敏實心於民善政不一

牟應時漢中府人萬歷十年以舉人知平遙縣有惠政民悅服之

李鈇宣府人萬歷十年知永寧州廉正明敏去後民立德政碑

謝梧任邱人嘉靖戊午舉人萬歷十七年知孝義縣務以鎮靜與民休息

張問行邢臺人萬歷十八年以舉人知臨縣平易近民端方持已去後人多思之

何其智固安人萬歷十九年以進士知平遙縣推求縣中利弊與除殆盡擢戶部主事

高數仞寶雞人萬歷已卯舉人二十年知孝義縣訟簡民安

楊正達武陵人萬歷二十年以舉人知寧鄉縣清操卓絕推誠惠民去後民特立祠祀之

越應揚延津人萬歷二十一年知平遙縣愛民除弊恩威並著

李悌興濟人嘉靖癸卯舉人萬歷二十二年知孝義縣嚴察胥吏恐為民患無敢犯者

麻溶宣城人萬歷癸未進士二十三年由吏部郎中擢分守冀南道廉儉自持判斷神明

周之度朝城人萬歷二十三年知平遙縣有廉操治事精明

馬之麟永年人以舉人萬歷二十三年知永寧州在任數月治化大著尋改朔州

夏惟勤，冀州人。萬歷二十三年，知永寧州，修學築城，督課士子，砥礪鄉約。時俺答數為患，率鄉兵大破之，擢青州府同知。去任之日，老幼涕泣，建生祠於東關。

史記事，渭南人。萬歷乙未進士。二十四年，知介休縣，善政不一。歷官光祿寺少卿。

陳翔鸞，閩縣人。萬歷二十五年，以舉人為介休縣教諭，學博行廉，以甘貧嗜學，訓諸生，修育才館，羣萃其中而督課之，多所成就。遷徽州府通判。

魏學徵，咸陽人。萬歷二十六年，以舉人知平遙縣，清廉果斷，以母憂去。民為建生祠。服闋後，起知平陸縣。三十

三年，知介休縣，有政聲，不數月，死於官。

王儒，平利人。萬歷二十六年，知孝義縣，明斷有守。

周佑，修武人。萬歷戊戌進士。二十七年，知孝義縣，令行禁止，罷官歸。民咸惜之。

高第，祥符人。以舉人。萬歷二十七年，知永寧州，廉正愛民。

劉令譽，平涼人。萬歷甲午舉人。三十二年，知孝義縣，撫愛其民，飭頽振廢。

尹覺民，萬歷三十三年，以進士知汾陽縣，廉幹有能，聲以利民，善俗為務。

盧尙禮耀州人萬歷三十八年以舉人知平遙縣撫民慈愛而斷事如神居官兩月民服其化未幾卒咸悲思之。

孟道溥霸州人萬歷辛卯舉人三十九年知孝義縣有善政時縣遭水患道溥於南關外築護城隄長七里廬舍城垣藉保無虞縣建祠祀之。

劉一佺字存吾陝西盩厔人以舉人萬歷四十一年知汾州府爲清官第一向有石鴈照汾州清官不到頭之謠一佺鑄鐵鳳鎮之擢雲南清軍驛鹽道副使。

楊天璋永昌衛人萬歷四十二年知平遙縣有廉操治

尙簡要居官二載而卒遠近咸哀傷巷哭。

張九賢歷城人萬歷四十三年以進士知汾陽縣務滌民害尤善治盜代去後民咸思之。

楊廷謨清苑人萬歷四十四年以舉人知平遙縣有長才居心仁愛在官多美績擢光祿寺署正。

諸葛昇浙江壽昌人萬歷四十五年知臨縣多惠政去後民爲建祠。

孫起鳳故城人萬歷四十六年爲平遙縣主簿以節操稱。

許宗禮長垣人萬歷丙辰進士四十七年知孝義縣勤

沙州府志 卷十一
民事有節操自奉儉約不取於民改榆次縣民不忍其去建祠祀之。

楊起鳳寶雞人天啟初爲介休縣教諭士悅其教造就者衆。

李先成長垣人天啟二年以舉人知平遙縣撫民重士懲抑豪強有風力聲不一載卒於官人哀悼之。

盧榮春扶溝人天啟二年以舉人知介休縣耿介嚴明無敢干以私丁憂去任。

何文烈騰蛟字雲從黎平衛人天啟元年舉人崇正元年知介休縣時流賊蠭起多方捍禦改汾陽縣士民伏

闕乞留適遭父憂而賊來犯境揮涕視事設方畧退賊乃去士民哭送立生祠騰蛟才智精敏所在見稱十六年拜右僉都御史永明王加騰蛟太師進爵爲侯後聞其死節哀悼賜祭者九贈中湘王謚曰文烈。

劉光祚字洪基榆林衛人崇正三年奉詔勤王與何可綱等戰灤州有功遷汾州叅將五年與遊擊王尙義敗賊張有義於臨縣賊還兵犯之仍爲賊所據光祚偕諸將逐賊復臨縣六年賊犯石樓光祚分三道進擊大敗之斬隔溝飛撲天虎等六人獲首功三百七十又數敗賊於臨永寧撲天虎等詐降光祚設伏斬之已而擊敗

賊魏家灣黑茶山七年勦敗王剛餘黨斬四百餘級加署都督僉事爲山西副總兵敗賊崞縣復其城八年賊渠賀宗漢號活地草者見其黨劉浩然高加計破滅僞乞降光祚伏兵斬之晉中羣盜皆盡十四年賊已陷河南襄陽中原郡縣大抵殘破光祚士馬無幾雖少有克捷而賊勢轉盛及傅宗龍敗沒於項城南陽震恐光祚適經其地唐王邀與共守城陷遂死之

費甲鏢陝西咸寧人崇正四年以舉人知平遙縣有善政六年改知汾陽縣老穉扳轅立去思碑時流寇蔓延巡撫許鼎臣以曹文詔軍平定備太原東太監閻思印

同總兵張應昌軍汾州備太原西賊至彰德應昌等出兵進勦甲鏢爲閻思印所逼投井死士庶皆枕屍哭劉太監聞之抗疏白其事

李雲鴻通許人崇正四年以進士知介休縣恤民禦寇境賴以安薦卓異改陽曲縣尋擢御史巡按廣西

楊學程漢中以舉人崇正五年知永寧州天資明敏遇事洞見本末吏民畏服遷成都府同知民立祠祀於東關

王肇生山東掖縣人崇正六年爲分守冀南道事實無可考有王公平寇碑見藝文

汾州府志 卷十一
魏錫祚陝西固原州人崇正六年知臨縣先是縣爲寇陷雖經新復餘孽猶間起錫祚撫養殘黎竭力捍衛凡五年盜靖民安治行大著後致政歸士民泣送數十里不絕建祠祀之

朱國翰洛陽人崇正七年以進士知介休縣實心洽於民民歡誦之累官濟南道

張首標玉田人崇正八年以進士知汾陽縣時宗藩橫恣慶成王立金字下馬牌於府門有司垂首聽命首標獨不屈榜於通衢曰敢有恃勢魚肉我民者輕則徑自發落重則具牒兩臺請旨究擬藩役聞之歛迹未幾卒

民哀痛之

王凝命昆明人崇正九年以進士知平遙縣有幹濟才處已廉潔累官薊州僉事

董維璉獲鹿人崇正十三年以舉人知石樓縣政尙嚴明而用心慈愛民歌訟之

張于鼎內江人崇正十四年以舉人知平遙縣聽斷明決

仇秉忠歙縣人崇正十四年知永寧州招撫流移勤課多士擢杭州府同知士民各立去思碑一在署東一在東關甕城

李若星寧陵人崇正十六年以舉人知介休縣有善政去後民立祠於順城關

侯君昭知汾州府崇正十七年城破不屈死

劉必達陝西三原人崇正末知汾陽縣城破死之義勇范奇芳亦自到

韓易知涇陽人以舉人爲平遙縣教諭士敬其學擢去後爲立遺愛碑

劉宗仁藁城人爲平遙縣訓導清節自持動一於正

趙璿平定州人性至孝爲介休縣教諭廉正有學擢知新樂縣門人追送四十里外各掩涕不忍別立去思碑

於明倫堂後

李光米脂人知石樓縣民歌其美政

劉紹恤浙江人以進士知石樓縣愛民興教培植多人

王三益永城人以舉人知石樓縣居官廉靜慈愛

田旣霑富平人知石樓縣有廉操撫愛其民

李鳴環東鹿人知石樓縣有保城功善弭盜擢知寧州

王常吉順天人爲石樓縣典史縣志云捕盜死難士民愴懷

劉永祚真定人事繼母以孝聞爲永寧州學正勤課士恤貧生

汾州府志 卷十一
右明百七十五人。舊志於名宦祠列汾州知州李棠何賢於平遙縣名宦祠列平遙縣知縣田愉張恕於介休縣名宦祠列介休縣知縣彭鏞於孝義縣名宦祠列縣丞衛健於臨縣名宦祠列臨縣知縣張雲高峻於永寧州名宦祠列總制三邊兵部尚書前石州知州才寬判官贈知州陶璽於寧鄉縣名宦祠列寧鄉縣知縣梁杲姚昱張軾志成於萬曆三十七年己酉凡得十有三人。以後汾州府知府廉賢如劉一佺殉難如侯君昭參將之有功於此且其後以身殉國者如劉光祚皆未載入祀典則志久不修失於稽考

故也。而府屬一州七縣如舊志所列而外增祀名宦汾陽縣則有分守冀南道於敖知縣費甲鏞劉必達平遙縣則有知縣韓偉訓導葉伯巨介休縣則有知縣史記事盧榮春教諭楊起鳳孝義縣則有知縣齊政沈純李瓊張口昇閔以仁王錦陳情臨縣則有知縣汪清李承嗣任大伯脫鎬賀定國張問行諸葛昇魏錫祚石樓縣則有知縣顧碩鄭紀王仁主簿宗秉彝永寧州則有石州知州李昇李春芳學正許孟和寧鄉縣則有知縣公一揚郭然楊正達典史李完又得三十有四人通四十七人而已。大抵府州縣志名

宦之曰遠者空憑諸史傳近者實得之見聞非位高
名顯固作史所不及是以愈遠則愈湮失卽數十百
年間能言其居官之賢否矣而又徃徃加以評論
虛辭無事實良可惜也至列在祀典與未列祀典則
或張而舉或弛而廢責屬後人不關前賢之優劣自
古迄今功德施於民一再傳而泯焉無聞也者可勝
道哉

莊應麒會稽人順治元年爲介休縣典史招流亡弭盜
賊救水災民咸德之

劉奇遇瀋陽人順治二年以國子監助教知石樓縣政

簡刑清請蠲荒地租稅招撫流離善政甚多擢知揚州
府

遲日益廣寧右衛人順治二年知永寧州州當殘破之
餘撫愛其民興利除害民賴以甦

王之佐浙江人順治二年爲臨縣典史姜瓖之亂知縣
張耀祖守城死之佐領兵民急趨上趙寨欲擒渠魁以
圖恢復力不支爲賊所執義不屈膝罵賊以死

單可繼高安人順治三年爲平遙縣典史治事有賢聲
史具勲華陰人順治四年以進士知寧鄉縣有廉操慈
祥愛民

黃廷栢遼東海州衛人幼孤事母至孝順治元年以薦徵知靈璧縣有治績轉大興縣五年擢知汾州府明年死姜瓖之亂贈太僕寺卿康熙四十六年祀名宦祠五十六年又建專祠方守城時賊圍之數重廷栢選勇士夜襲賊營賊驚擾及旦賊來益衆陷東門入廷栢身當其衝連發矢中賊墮馬復巷戰自辰至午與壯士格殺數十百人會大風起晝晦賊截擊廷栢與壯士遂分被執不屈死

張希載廣昌人順治五年爲石樓縣教諭持循端嚴多士奉爲師範

張耀祖遼東人順治六年知臨縣姜瓖之亂賊大至圍城攻之急耀祖曰此吾效命之秋也力守以死贈按察司僉事

周召南字晉侯遼陽人順治六年知汾州府時寇亂初定召南以招徠撫綏爲務除豪強胥吏之爲民害者嘗命所屬州縣官徭賦有當開豁者當均平者悉稽以告將爲民請命令下比屋歡呼在任三年擢山西驛傳道民共立遺愛碑道左

劉鳳翔利津人順治六年知永寧州政簡刑清值歲饑捐俸以賑累官武昌兵備道

汾州府志 卷十一
李國維滿洲人順治七年知臨縣廉靜愛民及去士民泣送於途立去思碑

王之儀字虞廷遼東廣寧人順治七年知寧鄉縣時姜瓖之亂初平逋亡幾半之儀年甫二十招徠有方且爲規畫生計民得復業值山水暴漲毀城垣十丈有奇之儀立淋潦督衆完築水退創護城隄樹柳其上遷知海寧州後擢知福州府耿精忠之亂之儀不屈死寧鄉之民歷久猶思其澤

孫世蓋興縣人順治八年爲臨縣訓導勤於課士持身接物足爲楷式

楊士英鐵嶺衛人順治十年知石樓縣廉靜愛民

胡士廉嘉興人順治十三年知臨縣廉靜愛民以拂上官意罷歸民泣送之

王嘉言天城衛人順治十三年爲臨縣訓導有學行

周士章上元人順治十三年以舉人知石樓縣石樓在萬山中土尤瘠重以兵燹之餘民就凋敝士章性硜潔不以家累自隨平徭弭盜通商勸農居之期年民始蘇丁憂歸後士民謠誦之

郎永清字定菴遼東廣寧人順治十四年知汾州府有善政累官山東巡撫

汝州府志卷十一
姚開先字堯門陝西淳化人順治十五年知臨縣有政聲以父憂去後補官四川吳逆之變被執不屈死秦一鴻會稽人順治中石樓縣典史賊皆歛跡民以寧靜。

周祚昌字定孺三原人康熙元年以舉人知寧鄉縣赴任惟隨一子一僕廉儉自持食用極淡泊而勤勞撫字民深受其澤。

陳之文臨川人康熙八年以舉人知孝義縣多惠政縣境舊按里派差徃徃有偏苦之累之文爲均其里甲代去後民建生祠祀之。

任珩字少玉高密人順治辛丑進士康熙八年知石樓縣多惠政招流移復逋賦才識明敏民懷其德累官浙江道監察御史掌京畿道事京師坊市豪強多以私錢牟重息有印子墜子轉子之目珩榜示禁之。

張恪涇陽人康熙十年以舉人知平遙縣性嚴直剛介實心愛民尤重士每優禮之然無敢干以私時軍過有索求擾民者恪親徃當之領師者以是得罪縣中之豪爲民病恪廉知其狀杖殺之以母憂去一清如水人咸稱曰清廉張公。

陳大來字春軒龍溪人康熙十年以舉人知寧鄉縣廉

儉愛民一如前任周祚昌

莊措武進人康熙十四年以進士知臨縣鎮靜不擾振興文教值奉文加賦爲民抗請然後酌加民不爲苦擢知騰越州

金一鳳大興人康熙十九年知介休縣凡胥役與縣中豪強交通病民者纖悉知之置諸法民安其業獄省訟清

黃汝鈺廣寧人康熙二十一年知平遙縣有廉操裁決獄訟不使株連時軍過必親送之恐或擾民

張奇抱蓋平人康熙二十二年知汾州府盡心民事明

年府境汾水秋水漲溢爲災凡五載汾陽臨之民荐困於淹浸撫循之曲至思所以拯其民者不遺餘力審視地形高下修築隄堰民立石用誌不忘

張泰孚淄川人康熙二十六年以舉人知孝義縣有廉操嚴馭吏胥而不任喜怒勤於職晨起治事日昃不遑食丙夜猶危坐閱文案邑人頌之

王埴榆林人康熙二十八年知介休縣有善政蒞任旣久於民間利病纖悉不遺鸞鷲等泉引渠資溉累至爭訟埴爲分別籌畫弊清而訟遂息

劉鼎文湖廣人康熙二十八年以進士知寧鄉縣剛正

嚴明甫下車吏胥為之肅然因上下都田賦不均力為申請積弊一清卒於官民立石以誌功德

戴曰巖字羅林金谿人康熙三十年以舉人知寧鄉縣性坦易有惠政去後既久民猶懷思之

王傑高淳人康熙三十三年以進士知平遙縣值歲饑設法賑濟全活甚眾有賢良稱行取額外主事累官禮科掌印給事中

高必遴遼東人康熙三十三年知石樓縣性骨鯁有治才民賴其善政

魚鸞翔陝西高陵人康熙三十三年以進士知石樓縣

除弊愛民後官江西學使亦大有聲譽

唐勳潁州人康熙三十五年知臨縣有古循吏風值兵荒忤上官意縊於署民悲泣之

呂履恒字元素河南新安人明大司馬忠節公維祺之孫也康熙甲戌進士三十八年知寧鄉縣性敏恕撫羸

弱尤有恩庭幾絕笞扑設催科籍冊時召鄉里民參驗胥吏不得少生弊端經術飾吏治進弟子員親第其文

藝甲乙為之口講指畫不倦以治行擢御史累官戶部左侍郎

謝汝霖字用弼福建長樂人以舉人知延川縣康熙四

十年擢知永寧州興利滌弊多善政民稱爲自古清官第一然以廉直頗不得於上官州北曰大孝都曰東相下都曰勤忠下都皆磽瘠地而賦重於他都由往年奸黠之民飛詭積弊汝霖深知三都樂歲尙不足供賦歲奏銷用已俸墊入而民不知也以未得請勘丈均賦爲憾卒於官至不能殯斂民皆巷哭失聲立專祠祀之仇長發曲沃人康熙四十一年知臨縣厚重愛民振興文教在任八年士民咸沐其教澤

韓貽豐字燕公慈谿人康熙四十九年以進士知石樓縣有政聲擢本府同知

蕭蕙邠州人以鄉舉第一人康熙六十二年知介休縣縣境舊食鄰近土鹽雖行河東引而不食其鹽名曰鹽稅旣而設商以土鹽價同運城蕙力請於上官謂民不食運城鹽而甘輸鹽稅者由價昂且不便民也旣輸鹽稅而又設商以昂價強之巡丁橫行窮簷愁怨於是廢商聽民自便民甚賴之

方士模歙縣人雍正元年以舉人知孝義縣釐奸剔弊盜竊殆絕每聽訟執事胥役不敢多一語權知寧鄉有兩縣神君之頌

麥士偉字蓮亭江陵人雍正元年知石樓縣撫愛其民

招集流移復業過半於其去職民甚懷之

馮雲燦金壇人以歲貢雍正二年知汾陽縣有惠政越六年擢本府同知熟悉民事時豪右藉銷鹽無端滋害雲燦思永久便民遂有按糧攤課之議汾陽之鹽稅得以循例輸納弊無從起者此議之力也

許炳元嘉興人以舉人雍正五年知永寧州惠政洽於民擢江寧督捕同知

袁學謨字迪來彭澤人雍正甲辰進士五年知石樓縣有善政民作歌頌之改知汾陽縣

宋國相偏關人雍正五年爲石樓縣訓導性廉介善於課士

竇容恂石城人以進士雍正七年知汾州府多善政創立西河書院拔擢秀民造就之成其材

張延年欒城人雍正癸卯舉人七年知汾陽縣廉正愛民待士以禮而抑其奔競治豪滑制胥役嚴盜賊民懷其善政被劾以去士民哭送於道者不絕

張學林丹徒人以貢生雍正八年知汾州府視利有可興害有可除力爲民任之汾陽舊食鄰近煎鹽後豪右與胥役朋比作奸卽以土鹽歸商銷假名巡查私鹽大爲民害至不能堪訴於官學林察知其隱積弊由是滌

絕

林中柟泗州人以歲貢雍正八年知汾陽縣慈祥愛民時知府張學林崔應階相繼釐清鹽法檄縣議覆中柟以鹽稅及平餘總攤入地丁銀內徵收永除豪右侵害且杜額外加耗之漸有碑記其在任多惠政

陳士俊會稽人雍正八年為石樓縣典史有廉聲捕緝多方

崔應階江夏人以廕生雍正九年知汾州府遇事明而果斷初蒞任前守理汾陽鹽政商銷病民案未結以法治之不少貸豪滑無所施其技

吳錯字靜巖江南婁縣人康熙戊子舉人雍正十三年知寧鄉縣操持廉正實心愛民在任十有一年一權知永寧州事一兼攝石樓縣皆剔除積弊三州縣士民咸稱頌之不衰先時雍正十年查墾荒地畷前任邵之楷虛報可墾地四百頃二十餘畷歲應徵折色銀三百一十七兩有奇實無其地徒議按糧均攤每兩加徵銀三分錯力陳之上官得題請豁免

葉鵬雲商邱人乾隆元年權知孝義縣僅五閱月以居心仁厚蒞政嚴明去為民思

李肇開桐鄉人雍正癸卯進士乾隆二年知孝義縣在

官無赫赫之功去後人懷思之縣倉糧出入最爲民累
肇開深悉其弊蒞任六載未嘗一開發

張坦讓漢陽人以舉人乾隆四年知汾州府廉正恤民
先是雍正十年查墾荒地明寧鄉縣知縣邵之楷虛報
可墾地四百頃二十餘畝是無其地後知縣吳錯念民
力不支欲請不得間會坦讓至遂以爲言坦讓力任之
得具題豁免在官八年多善政

耿毓青漢軍監生由鄖府通判乾隆十五年擢知永寧
州善治豪滑聲稱大著

張鎮海豐人乾隆十七年知介休縣善除奸慝盜賊嘗

曰治民如治稼去其害稼者而已去後民懷思之

周章煥江津人以舉人知吳橋縣乾隆十七年擢知永
寧州慈祥撫字吏民懷之

胡相忠贛縣人乾隆二十年以進士知介休縣善撫教
能感入人心民俗失在剛悍相忠蒞任一載俗爲之變
以丁憂去民哭送於道

巫慧和州人乾隆二十四年以進士知介休縣甫下車
值歲大旱米一石價至錢十三千民握草剥榆爲食適
河南運陝西米三萬五千石過縣慧截留之卽以饑民
情狀請於大吏於是上官奇之爲移文關知河南因得

減價平糶全活饑民以萬計。

徐珏南豐人乾隆二十七年以進士知汾陽縣謝絕餽遺裁免行戶縣役素橫肆珏痛懲之於是民情纖悉得達於官數月惠聲大著盜賊至相戒不入境縣倉例春放秋收名取耗息若干而民還輒倍遠鄉下戶不親納或三倍未已入務精善出時徃徃以粗惡其弊不可究詰民咸苦之珏親其收放令出入如例蓋珏未第時嘗遊汾晉間知其利病故動合政要加以實心愛民民亦戴之如親父母未幾調寧武去之日自城至境壺榼不絕送者塞途村民持田器奔來拜道左或望見已遠則

遙拜之八九十歲老人言聞見以來汾陽之官一人而已。

顧學潮元和人乾隆二十八年知汾陽縣清操惠政一如徐令而才尤敏嘗密訪市井兇頑榜其名廳事左右凡酌酒鬪毆到官視壁上有名者重懲諸兇徒屏息汾陽故多民訟學潮得狀卽按去城遠近限時刻勾審用杜胥吏生弊甫一年擢知灤州。

汪嘉濟元和人乾隆甲子舉人三十一年權知孝義縣在官僅八閱月廉靜不擾每聽斷必委曲開導不輒加刑而民咸服其明允。

右國朝以來六十六人已祀名宦祠者。知府黃廷柏、郎永清、孝義縣則知縣張泰孚、臨縣則知縣張耀祖、莊搢、仇長發、典史王之佐、石樓縣則知縣任珙、永寧州則知州謝汝霖、寧鄉縣則知縣呂履恒。凡十人而孝義縣又祀巡撫申朝紀、總督白秉政。莫詳其故。山西通志於名宦內列王昌運、順治二年知寧鄉縣。考王昌運於順治二年知鄉寧縣，未嘗知寧鄉。殆縣名倒寫，誤入於此。又列寧鄉縣知縣龔應霖，而云縣在萬山中，多虎患，應霖始至，虎遁去，循聲卓然。考寧鄉縣志成於康熙四十一年，應霖廣東四會人，以康

熙二十二年知寧鄉縣，在任六年，行取工科給事中，相距纔十餘年間，而志云越俗尙鬼，多所修建，善事上官，費用頗煩，然取於民而民不怨，志固不足之，而未敢顯言，要其爲官之概，非良吏已可見矣。下又云：邑東澮溝路，雖屬孝義，寔我寧，以粟易械，孔道時多虎患，公捐貲買地，建元壇廟，念行人苦渴，擇地鑿井，不可謂非善政也。通志虎遁去之說，豈因此附會歟。繼任者爲劉鼎文，志稱其甫下車，豪猾遁跡，吏胥肅然。下又云：天不祐寧，一年而卒，我寧世食公德，勒石以志。觀此寧鄉人之怨應霖已甚於直斥尙列之名。

宦設誣辭以謂其循聲卓然何哉

然不又云天下無難事一難而卒非學世貪公懸碑石

歸于春為隆顯文志謝其雨丁車臺傑戲視吏胥蕭

不何謂非善類也戲志與戲去之歸豈因地州會燬

孰患公附費買此戲示戲願念許人苦戲對戲鑿其

呂東漸漸知戲風平善享非學以粟是辦非戲視之

宋郊戲言要其戲官之辦非真吏日何果矣不又云

土官費限戲戲戲戲戲而只不惑志固不疑之而

琳瓊錄十餘年地志云戲谷尚思多視對戲行事

戲二十二平戲寧深錄五至六平行取工林命事

